



06. oktober 2019

UKA 2019/32
Aqqalu C.Jerimiassen

Nunatta inuiattut timersornikkut unammersuarterfissaanik FIFA-p piumasaqaataanut naapertuuttumik pilersitsinerup avataaniit aningaasaliisussarsiuunnissaanut periarfissanik aningaasalersueriaasissatut ilusissamillu misissuisussanik suleqatigiisitamik pilersitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Suleqatigiissitaq aningaasalersuinissamik misissuinerup inerneranik UKA2020-imi Naalakkersuisut Inatsisartunut saqqummiutissagaat.

(Inatsisartunut ilaasortaq Anders Olsen, Siumut)

Nunarsuarmioqataanitsinni isikkamik arsarnerinnarluunniit eqqarsaatigissangaanni, tamatta nalunngikkunnarsivarput ingasaassinngiluatsiaannartumik malinnaasuusugut ikinngitsukasiungunarpugut, soorlumi siunnersuuteqartoq nammineq sumik tujuuluaqartarnersoq takuinnariaraanni ulluinnarni (naak ilerinnikkaluarlugu).

Taamaammallumi pissusissamisuuinnalersimavoq maanna piviusorsiorlunilu, FIFA-p piumasaqaataanut naammaattumik qulisamik peqalernissaq.

Taamatullumi ittumik peqarlernikkut taamaat timersornermut sunniuteqassanngimmat, allarpassuarnut assigiinngitsunut timersornerup avataatigut atorneqarsinnaassammat, assersuutingalugu nipilersornikkut festivalinik angisuunik aaqqissuussinissaminut inissaqartitsilissalluni.

Siunnersuuteqartoq Atassumiik ugguuna taparserumavarput, aningaasaliisussarsiornermi inissisimaffissatut Nuup toqqarneqarnera, tassami illoqarfiit pingaarnersaattut inissisimatillugu nunatsinnilu inuttunerpaatillugu aningaasaleerusussuseq qaffasinnerussaqqimmat illoqarfiit sinnerinut naleqqiullugu.

Inuiattut katersuuffissamik unammiaarnernik angisuunik pilersitsiffiususaaq timersornikkuinnaq iluaqutaajunnangilaq, inuiaqatigiittulli imminut naleqartinnitsinnuttaaq inuiaassutsimillu tulluusimaarutiginninnermik pilersitsissammat.

Taamaattumik taamatut Atassumiik oqaaseqarluta siunnersuut tamakkiisumik taparserparput.